

Èkwo ké mbù, Pòlu deru nù Tímoti

¹ Èkwo-ozí-wa shi l'èka mbèdua, bù Pòlu; mbù mubè onye ishi-ozí Kuráýisutu Jisòsu. Ò bù Nchileke onò, bù onye adzoje ayí onò; mè Kuráýisutu Jisòsu onò, bù onye onò, ayí ele ènya iya onò bè ziru mu tẹ mu bùru onye ishi-ozí onò.

² Onye mu ede èkwo-wa anù bù nggùbedua, bù Tímoti, dùwa l'ò bù nwatibe mu; okfu l'ò mu; bè dutaru ngu nù; nggu abya ekweta l'ò Kuráýisutu Jisòsu bù Nnajiufu.

Tẹ Nchileke, bù Nna; mè Nnajiufu, bù Kuráýisutu Jisòsu meeru ngu eze-iphe-òma; yò phàru ngu imiko; mekwaaphu t'èhu dù ngu agù.

Aalò ndu ejo nzizi èka lẹ nchì

³ Teke onò, mu shi eje Masedóniya onò bè mu kfukwaru ngu; byiko; t'ì nòdukpelekwaphu lẹ Éfesòsu. L'ò nwekwaru ndu nò l'èke onò ezi iphe tuko bùkotaru ejo-ire. Òo ya bù iphe òbu, mu ekfu t'ì nòdu l'èke onò gbò-chijee èphe nchì; t'èphe be zishi iphe è-ta bùdu òkpobe okfu onò. ⁴ Nggu ekfukwaruphu èphe t'èphe ba anòjehe akò-phe mkpòkoro akò-ife ndu Ju; mè ògushi ndzekfu-ndzekfu èpha ndiche; mbù èpha, è-ta agvùjedu agvùgvu. Egbe iphe onò bè bùlekwaphu ntùtego bè òokpataje. È too yejekwaru madzù èka t'èphe mee iphe, Nchileke

tùberu t'èphe mee; bù iya bù iphe ayi shi l'ozi-oma ono, ayi kwetaru ono maru. ⁵ Iphe kparu iphe mu nmaru ngu òkwa ono bè bùkwa k'òphu ndu kẹ Kuráyisutu e-yeru ibe èphe obu. Obu ono, èphe e-yeru ibe èphe ono abùru n-yemobu òphu e gude obu iphoro yee; bya egude obu òphu mawaru iphe, gbaru iya l'ememe; mẹ okweta kẹ Nchileke ògbodo ekweta yee ya. ⁶ O nweru ndu hawaru shiswee òkpobe ọzo ono; chebe ifu ichefu; shiwaru ẹge ono wata okfuphe mkpòkoro okfu. ⁷ Ndu ono bè ọogu agugu t'èphe bùru ndu ezi ekemu Nchileke; l'ẹ-ba bù l'iphe ono, èphe ekfu ono doru èphe ẹnya; e guderu l'èphe arị l'èphe maru iya.

⁸ Ayibedua l'ayi ha bè tükokwa makọtawaru l'ekemu Nchileke bè dù mma m'ọ -bùru l'eetsokwa iya ẹge ọ gbaru t'e tsoje iya. ⁹ Iphe òphu dokwanuru ẹnya abùru l'ẹ tọ bùkwa ndu doberu ẹka ndoo l'ifu Nchileke bè Nchileke gude k'ẹhu èphe tọ ekemu ono. Ndu o gbe tọ ya doberu bùkwa ndu emebyi ekemu ono emebyi; tọaru iya ndu ekwefuru iya íkè; tọaru iya ndu, eme iphe dù ẹji; l'akpọ Nchileke ẹbo-ẹbo l'afu; tọaru iya ndu ẹ-te tsodu ọzo Nchileke; tọaru iya ndu ẹ-te nwedu iphe òphu bù kẹ Nchileke m'ọo nanu, èphe doberu nsọ; tọaru iya ndu egbuje nne lẹ nna èphe; tọaru iya ndu mgbugbu-madzọ l'èphe ha. ¹⁰ A tọru iya doberu ndu uru-alị; mẹ unwoke, ejekfuje unwoke ibe èphe azẹe-nwoke-yẹe-nwanyi; bya atọ ya doberu ndu apajẹ madzọ l'iphura. A tọru iya doberu ndu adzọje ẹjo-ire; mẹ ndu aguje ẹnwa tukobe onwèphe l'ishi l'iphe èphe mechacharu-a; bya atọ ya

doberu iphe bụ ndu emeebe iphe ono, bụ iphe adaka okpobe okfu ono, e ziru unu ono adaka. O bụ egbe ndu a tũru ekemu ono doberu ndono. ¹¹ Okpobe okfu ono, e ziru unu ono bę shi l'ozĩ-oma ono, Jisosu Kuráyisutu yeru mu l'eka ono. Ozi-oma ono abụkwanuru ozi-oma k'odu-biribiri kę Nchileke ono, bụ Nchileke, dűeberu mma; dzukota oke l'ime onwiya ono.

Pọlu etu Nchileke ępha

¹² Mu etu Nnajiufu ayi, bụ Kuráyisutu Jisosu ępha. Oo ya bę bụ onye meru; mu adu ike oje ozi-wa, mu eje-wa. Mu etu iya ępha ono; okfu l'olewaru ęnya; phu lę mu dű k'ophu ya e-gude ire mu ęka; ęota mu tę mu jeeru iya ozi ono. ¹³ A makwaru-a lę mu shi anọduje ekfurushi Jisosu Kuráyisutu ekfurushi l'odungu; shi anọduje achi nta iya; shikwaphu eme iya iphe-iphere. Obenu lę Nchileke bę phulekwaru mu-a imiko; okfu l'iphe ono, mu shi eme ono bę mu shi eme l'oma-ama. Mu te shidu kwetawa teke ono l'oo Jisosu bụ Nnajiufu. ¹⁴ Tọ dű iya bụ lę Nnajiufu ayi, bụ Jisosu Kuráyisutu ono abya aphuaru mu imiko, nyiberu ọtu ọnu iya. Yo mee mu; mu abya ekweta l'oo yębedua bụ Nnajiufu; mekwaa mu phu; mu abya eyeru ndu ọdo obu. Onanu aburu iphe oomejeru iphe bụ ndu ęphe l'iya tugbaberu buru nanu. ¹⁵ Okfu-a bę bükwa okpobe okfu, ophu gbaru tę ndiphe mgburumgburu gbobe ęka labu nata iya: lę Jisosu Kuráyisutu bę byaru lę mgboko-a tę ya bya adzọo ndu eme iphe dű ęji. Yọ buru mbedua bę bụ onye pataru ishi ome iphe dű ęji ono. ¹⁶ O bụ iya meru iphe

Jisosu Kuráýisutu phuru mu imiko; mee t'ò buru l'èhu mu; bẹ ya e-shi koshi ndu ọdo ẹge ọtan-shi nk'íya habe nshinu. Ọo ya bụ lẹ Jisosu Kuráýisutu bẹ gude ẹhu mu ekoshi ndu ọdo lẹ ya a-dzọlee ẹphe; nụ ẹphe ndzụ gbururu jeye; m'ò -ruhuru; iphe dụ ẹji, ẹphe meru dụ ẹji idagha; m'ò -buru-a l'ẹphe woru onwẹphe ye iya l'ẹka. ¹⁷ Tẹ ndiphe kwabẹ Nchileke ugvu; ẹphe ajaa ya ajaja; mbụ Nchileke ono, bụ eze; yọ buru ẹge ono, ọ bụ eze ono b'ọo-buru iya jeyewaru. Ọo ya bụ Nchileke lanụ, nonu nwenkinyi iya; buru Nchileke ọphu ẹ-ta anwuhujedu anwuhu; te egudeje ẹnya phụ iya. T'a kwabeje iya ugvu; jaa ya ajaja gbururu jeye lẹ tutu yoyo. Ono kwa ẹge ọ dụ.

¹⁸ Tímoti; ọ kwa nggubedua, duwa l'ọ bụ nwat-ibe mu; bẹ mu ekfushi iphe-a eye l'ẹka. Iphe mu gude ekfuru ngu iya ẹge ono bụ tẹ mu nyataru ngu iphe ono, ndu nkfuchiru Nchileke kfuru l'èhu ngu ono. T'iphe ono, ẹphe kfuru ono mee obu ngu t'ò shihu ike; k'ọphu oo-nweeru iphe ii-gude aluru Nchileke ọgu ono, ìluru iya ono.

¹⁹ Kwekpelekwaphu kẹ Kuráýisutu; t'iphemiphe ọbule, iime bụjelekwaruphu iphe obu ngu maru ọhuma l'ọo iphe gbaru iya l'ememe. O nwekwaru ndu machacharu-a iphe gbaru ẹphe l'ememe; jịka iya ememe. Yọ buru iya meru; ekwekwe ọbu, ẹphe kweru kẹ Kuráýisutu ọbu eje avua onwiya l'ákpàà. ²⁰ Ndu haru yiru lẹ ndu ono bẹ bụ Hayimeníyosu; mẹ Alẹguzánda. Mu wookwaru ẹphe ye Sétanu l'ẹka t'ọ nua ẹphe aphụ; k'ọphu ẹphe a-mụtakwanu l'ẹ tọ dudu mma mbụ okfurushi Nchileke.

2

Ọbaru Nchileke ẹja lẹ Chọchi

¹ Iphe ọdungu, mu ekfu ekfushi iya ike bu: t'e kfujeru nu Nchileke t'ọ gbaaru ndu ọdo mkpu; kfujekwaruphu nu iya t'o mejeeru ẹphe iphe mkpa iya ọdu ẹphe. T'e kfujekwaruphu nu iya l'okfu ẹka iphe bu madu kpamukpamu; kejekwa iya pu ekele. ² T'e kfujeru nu Nchileke l'ẹka ndu eze; mewaru iphe bu ndu ishi, achi nu. Ọo ya bu k'ọpu nchi a-du ayi ndo; ayi eburu l'ẹhu-agu; me k'ọpu ayi a-ọduje anuru Nchileke okfu; eyeru iya ugu; me k'ọpu ayi a-ọduje eme umere, gbaru ayi l'iphemiphe ọbule, ayi eme ememe. ³ Ọ bu ono bu iphe du mma; bukwaru iya pu bu iphe atsọ Nchileke ẹna; mbu Nchileke ono, bu iya bu onye ono, adzoje ayi ono. ⁴ Ọ du Nchileke mma te ya dzofuta iphe bu madu kpamukpamu; dukwa iya pu t'a su l'iphe bu madu kpamukpamu byakotaru bya amaru iphe ono, bu ọkpobe okfu ono. ⁵ Ishi iya aburu l'ọ bu Nchileke lanu nwenkinyi be nonu. Yo bukwaruphu onye lanu nwenkinyi be no le mgbaku Nchileke yele madu. Onye ono bu Kurayisutu Jisusu, buhwaphu madu l'onwiya. ⁶ Jisusu ono woru onwiya chiaru Nchileke ẹja l'okfu ẹhu madu kpogbaa; k'ọpu ọo-gbata ndiphe mgburumburu. Iphe ono aburu iphe meleruphu teke Nchileke l'onwiya suru l'ọo teke oo-me; shi ẹge ono koshi l'ọ bu uche iya te ya dzoo ndiphe l'ẹphe ha. ⁷ Ọo ya meru iphe ọ fotaru mu; mee mu te mu buru onye ishi-ozu iya; k'ọpu mu e-gude ozi-oma ono

je araa ya arara l'alì ndu ẹ-ta bụdu ndu Ju; mu araa ya arara; zia ya ezizi; k'ọphu ẹphe e-kweta ọkpobe okfu ono. O kwa oswi-okfu bẹ mu ekfu-wa. Mu ta adzụkwa iya ẹjo-ire.

⁸ Iphe dụ mu mma bụ t'unwoke kfujekpelephu nụ Nchileke l'ẹkemeke ọbule, ẹphe nọ. T'ẹphe chilihuje ẹka ẹphe; gude obu iphoro ekfu anụ Nchileke. T'ẹhu be eghujekwa ẹphe eghughu; obu ta agbajẹ ẹphe ẹbo teke ẹphe -ekfu anụ Nchileke.

⁹ A bya abya l'unwanyi; iphe dụ mu mma bụ tẹ nwanyi rijee ọriri; maru egbe uwe ooye l'ẹhu. Tẹ nwanyi yeje uwe, gbaru iya nụ. T'iphe ẹphe e-gudeje emema onwẹphe bụru iphe e-koshi l'ẹphe doberu onwẹphe ọgà; l'akpadeje onwẹphe. T'ẹ b'ọ bụkwa omekwa ẹgbushi t'ọ bụru iya bụ iphe ẹnya a-nọje eje. T'unwanyi be egudejekwa mkpọla-ododo; mẹ ákà emema onwẹphe. Ẹphe t'eyeje uwe, erenuka ire gude akwa onwẹphe ngwa. ¹⁰ Iphe unwanyi e-gbe mejee bụ: t'ẹphe meje iphe-oma, bụkwanu iya bụ iphe gbaru ndu sụru lẹ Nchileke duru ẹphe lẹ nsọ l'ememe. ¹¹ T'unwanyi wozitaje onwẹphe alì ọgbodo ewozita; nọduje nwangijinggiji mụje iphe, eezi ẹphe. ¹² Mu te ekwekwa t'unwanyi zije iphe. Mu te ekwe t'o nweru nwanyi, a-nọdu aturu nwoke iphe ọo-nọdu emeje. T'ẹphe nọdujelekwaphu nwandoo. ¹³ L'ọ kwa Ádamu; bẹ Nchileke vu ụzo mee; b'o mederu Ívu. ¹⁴ Iphe ọdo bụ l'ẹ tọ bụkwa Ádamu bẹ Sétanu ghọru ụgho; ọ kwa ọphube nwanyi b'ọ ghọru iya; mee ya; yo mebyia ekemu, Nchileke turu.

15 Obenu l'iphe Nchileke e-gude dzọo ụnwanyi bu ọmushi ụnwu; m'ọ -bụkpowaru l'ephe vudoshi ike l'ekwekwe, ephe kweru ke Kuráyisutu; yekwaruphu ndu ọdo obu; bụru ndu ke Nchileke ọkpobe abubu; bya edobekwaphu onwephe ọgà.

3

Kẹ ndu ishi Chochi

¹ Iphe ono, e kfulu ono bụkwa ọkpobe okfu, suru: L'ọ -buru l'ọ nweru onye enya du te ya buru onye ishi chochi; onye ono kwa ọkpobe ozi, du mma be agu iya nu. ² Onye ishi chochi be bụfutajekwa onye e ta amaduru ejo eka. O bụfutaje onye alu nwanyi lanu kpu; bụkwaruphu onye akpadeje onwiya akpade. O bụfutaje onye nweru uche. O mefutaje umere, gbaru onye ishi chochi. T'onye obu bụkwaru onye ooheje uhere okwaru onye bataru nk'ia ebyee. O bụfutaje onye a-du ike ezi ndu ọdo iphe. ³ T'onye ono ba abukwa onye angunuka mee; to bu onye eme ehuka. T'onye ono buchiaru onye eme odoo; onye ta aswojedu uswo. Onye obu bụfutajekwa onye e-te yedu enya l'okpoga. ⁴ Onye ono bụfutajekwa onye a-du ike leta ufu iya enya ohuma; bụkwaruphu onye egirima iya anuru okfu; l'akwabekwa iya phu ugu. ⁵ Le teke bu le madzu ta dudu ike o buru ishi l'ufu iya; ?nanuhunu ege onye obu e-me du ike buru onye eleta chochi ke Nchileke enya? ⁶ T'onye ono ba abukwa onye bu-wokwadia b'ọ bya aburu onye ke Nchileke; k'ophu onye obu ta awatadu otse etsetse; shi

ẹge ono; Nchileke anma iya ikpe ẹge ọ nmaru iya Sétanu, bụ iya bụ Obutuswe. ⁷ Onye ishi chọchi a-bụkwaruphu onye ẹ-te vudu ẹjo ẹpha l'ẹke ndu ẹ-ta bụdu ndu chọchi nọ; ọo ya bụ t'ẹ b'o nwekwanu onye a-sujekpo l'ọ phuru ẹjo iphe onye chọchi meru; tẹ Sétanu, bụ Obutuswe be egudebua ya hata onye ishi chọchi l'onya.

Ndu ejeru Chọchi ozi

⁸ Ndu ejeru chọchi ozi bẹ bụfutajekwa ndu eeyejeru ugvu; ndu bụ: ẹphe -kfua okfu; a maru l'ẹphe kfuwaru uche-obu ẹphe. T'ẹphe ba abụkwa ndu ngunukaru mẹ; ẹphe ta bụ ndu anọduje achọ uru l'uzo, ẹ-ta dudu mma. ⁹ T'ẹphe gude obu ẹphe l'ọ ha gudepyabe ọkpobe okfu ono, ẹphe kwetaru ono, bụ ọkpobe okfu ono, Nchileke koshiru ayi ono. T'obu ba awajekwa ẹphe awawa. ¹⁰ T'e vujeodukwaru ụzo data ẹphe adata. Teke a datatsuaru ẹphe; to nwe ẹke, ọnu bọru ẹphe ẹbo; tẹmanu unu eyewaru ẹphe t'ẹphe jejeru chọchi ozi ọbu. ¹¹ Tẹ nyee onye ejeru chọchi ozi bụkwaru onye aakwabẹru ugvu. T'ọ bụkwaru nwanyi ẹ-ta asụdu asụ; bụkwaruphu onye akpadeje onwiya akpade. T'ọ bụru onye koshiru lẹ ya gbaru t'e gude ire iya ẹka l'iphemiphe ọbule, oome. ¹² T'onye ejeru chọchi ozi bụkwaru nwanyi lanu kpau b'ọo-nọdu alu. T'ọ bụkwaru onye aduje ike oletu unwu iya; mẹ ufu iya ẹnya ọhuma. ¹³ L'ọ -bụru lẹ ndu ejeru chọchi ozi bẹ kfube ọswa ejeghe iya ejeghe b'ọ gbakwaru t'a kwabeje ẹphe ugvu, ha nshinu. Ẹphe adujekwanu ike shia obu ike; asa iphe ono, ayi kweru ono kpa kpa; mbụ iphe ono, ayi

kweru l'ayi lẹ Kuráyisutu tugbaberu buru nanu ono.

Iphe Nchileke shi domia edomi

¹⁴ Mu arikwa lẹ mu ta anohedu anono nta-a; mu abyakfuta ngu. ¹⁵ Obenu lẹ mu edekwanuru ngu ekwo-ozí-wa; kele mu ta madu ege oo-me; yo nweru iphe a-kpata; mu akpofua ukfu. Iphe meru iphe mu ederu ngu iya bu t'i gude iya maru iphe gbaru ndu ke Nchileke l'ememe. Chochi b'i manarua l'oo ya bu ufu Nchileke; mbu Nchileke ono, no ndzu ono. O kwa ege itso yele ukfu ulo egudeje ulo; bu ege chochi gude okpobe okfu ono. ¹⁶ A toko kwetakota l'okpuberu okfu ono, Nchileke shi domia edomi ono; mbu okpobe okfu ono, kfu be oswa ha nshinu ogbodo ahaha ono. Nchileke koshiru iya ayi; ayi ekwetawa iya. Okpobe okfu obu be suru:

Lẹ Jisusu be byaru lẹ
 mgboko-a bya aburu madzu;
 Ume Nchileke ekoshi
 l'o bu onye doberu eka ndoo.
 Unwu ojozi-imigwe
 egudewa enya ephe phu iya.
 E kfukotaru iphe bu
 mbakeshi okfu ehu iya.
 Ndiphe ekweta nk'iya.
 Nchileke abya ekuta iya kuba l'imigwe;
 bya akwabe iya ugvu,
 ka ugvu.

4

Ndu ejo nzizi

¹ Ume Nchileke bẹ ekfuru iya ayi t'ọ gaa ayi ẹnu-nchị ọhuma; l'ọ -rudelephu l'oge ikperazu b'o nweru ndu e-wota ọkpobe okfu ono, ayi kwetaru ono dochi; wata ọnga nchị l'iphe ndu, ọgvu, bu ẹphe l'ẹhu eduphu eduphu ekfu; ẹphe awata otso iphe ọgvu ono ezi. ² Ndu ono, etso iphe ọgvu ezi ono bẹ ahaje tẹ ndu bu o-kfuru-iche-eme-iche phẹ gude ẹjo-ire, ẹphe anọduje adzushi edusweshi ẹphe. Ndu ẹjo-ire ono bẹ obu ẹphe ta amajehakwa iphe gbaru iya l'ememe; ẹke ọ dụwa lẹ Sétanu wowaru mkpụrukpu-ígwè, ọku nọ gude mee ẹphe iphe-ọhubama l'oriri ẹphe; gude koshi l'ọo ya nwe ẹphe. ³ Ndu, dụ ẹge ono bẹ iphe ẹphe anọduje ezi bu l'ẹ tọ dudu mma t'a lujee nwanyi; l'ekfukwaphu l'ọ nweru egbe nri ọphu ẹ-ta dudu mma tẹ madzụ riye iya. Obenu l'ọ kwa-a Nchileke bẹ meru nri ono t'e riye iya eriri; mbụ tẹ ndu ono, kweru l'ọo Nchileke bu Nchileke ẹphe ono riye iya; mẹ ẹphe -kelewa iya ekele iya; mbụkwa ndu ono, byawaru bya amaru ọkpobe okfu ono. ⁴ Iphemiphe ọbule, bu iphe Nchileke meru bẹ dukotakwa mma kẹ eriri. E to nwekwa ọphu gbaru kẹ t'ayi jikaje iya ajika. Ọ kwa iphe ayi e-meje bu t'ayi rijekwaa iphemiphe ọbule; m'ọ -buru-a l'ayi kelewaru Nchileke ekele iya. ⁵ Iphe ọbu bu l'okfu Nchileke; mẹ ekfukfu ono, e kfuru nụ Nchileke ono bẹ mewaru iya; yọ dụ nsọ l'ifu Nchileke.

Ọkpobe onye ozi Kuráyisutu

⁶ Teke i wotaru iphe-a, e kfukotaru ngu-wa; kfuaru iphe bu unwunna l'ẹphe ha bẹ bụkwa

iya bụ l'ì bụ onye ejeru Kuráyisutu ozi; eje iya ọgbodo ejeje. Ọo ya bụ; l'ii-koshi l'ọo okfu Nchileke ono, i kwetaru ono; mę ọkpobe iphe ono, e ziru ngu ono, i shikpelephu tsota ono bę bụ nri, i gude azụ onwongu. ⁷ Ba angabejekwa nchì lę mkpọkoro akọ-ife, ę-te nwedu oswi-okfu, nọ iya nù lę phuu; mbụ akọ tuko bukotaru iphe mmakanu. Iphe ii-gbe mee bụ t'ì hùje onwongu àhùhù; k'ọphu ii-shi ęge ono nọdu ndzụ, dụ Nchileke mma. ⁸ O nweru ndu anọduje àhù ugwehu ęphe àhùhù; k'ọphu ęphe e-shihu ike. Àhùhù ọphu aahù ugwehu bę uru nọkwa-a. Ọ kwa l'uru, nọ iya nù ta haduru nshinu. Obenu l'ọphu uru, nọ iya nù gbaru mgburumgburu bụ lę madzụ hùrù obu iya àhùhù; k'ọphu obu iya a-nọduje etso Nchileke. Ishi iya abukwanuru lę Nchileke kweru ukwa iya; lę ndu eme ęge ono bę ya e-meru eze-iphe-oma lę ndzụ ọphu ęphe nọ nta-a; meeru iya ęphe lę ndzụ ọphu ęphe a-nọ l'uzo ifu. ⁹ Okfu ono bę bụ okfu, e gude ęka, gbaru t'onnyemonye ọbule gbobe ęka labụ nata iya. ¹⁰ Ọo ya meru iphe ayi ekebeje ęhu ese akanya iya eseshi iya ike; okfu l'ayi ele ęnya Nchileke ono, nọ ndzụ ono; mbụ Nchileke ono, bụ yębedua bụ Onye Ndzota kę ndiphe kpamukpamu ono; ketekete kę ndu woru onwephe ye iya l'ęka.

¹¹ Kfuaru ęphe iphe ono kfushiaru iya ęphe ike; nggu ezikwaa ya phụ ęphe ezizi. ¹² Be ekwekwa t'o nweru onye a-nwuphe ngu ęnya; okfu l'ì bukwađu nwata. Iphe ii-gbe mee bụ t'ì meje umere, a-nọdu ekoshi ndu ọdo ęge ęphe a-

nòdu emeje iphe ono, iizi ephe ono; mekpò iphe iime ememe. Nnggu emeje umere, a-nòdu ekoshi ndu òdo ẹge ephe e-shije yeru ibe ephe obu ẹge nggubedua yeru ephe. Umere ngu emekwaaphu t'ephe kweta ke Nchileke ẹge nggubedua kwetaru. Ephe edobejekwaphu onwephe ògà ẹge i doberu onwongu. ¹³ Iphe ii-nòdujekpelephu eme jeye teke mu a-bya bukwa: t'ì gùjeru chòchi ẹkwo okfu Nchileke; nggu emeje t'obu shihu ephe ike; nggu atowashijekwaruphu ephe okfu Nchileke t'o doo ephe ẹnya. ¹⁴ Ba akwaswekwaru ẹnya l'iphe-oma ono, Nchileke meru ngu teke ono, ndu nkfuchiru Nchileke gude ike, Nchileke nuru ephe kfuchiaru iya ono; mbu teke ono, ndu e meru ogurennya chòchi byiberu ngu ẹka l'ishi ono. ¹⁵ Kebekpelekwaphu ẹhu meje iphe ono; nggu efupyabe ifu; meje iya ohuma; k'ophu onyemonye obule a-phu ẹge ijekpelephu l'ifu l'ifu. ¹⁶ Kwabekwaru umere ngu ẹnya; nggu akwabekwaruphu ẹnya l'iphe ono, iizi ndu òdo ono. Mejelekwaphu iphe ono ẹge ono; ke l'i -mewa iya ẹge ono; nggu adzoo onwongu ndzu; dzoo ndu anoduje eme iphe iikfu ndzu.

5

¹ Ba abajekwaru nwoke ogurennya mba. Iphe ii-meje bu t'ì tojee nwẹhu kfuru yeru iya; l'ò -bù iya bu nna ngu. Nnggu emejeru unwu-okorobyà; l'èphè -bù unwunne ngu. ² Unwanyi ogurennya be ii-mejeru; l'èphè -bù nne ngu. Nnggu emejekwaruphu unwu-mgboko; l'èphè -bù unwunne ngu. Dobebukwaa onwongu ògà l'ẹke, ephe nọ.

Ụnwanyi, maa tufuru

³ Kwabejekwa ụnwanyi, maa tufuru ugwu. Nggụ eletaje ẹphe ẹnya; m'ọ -buru l'ụnwanyi ono te nwehedu ẹge ẹphe maru iya onwẹphe lẹ phuu. ⁴ Teke bụ lẹ nwanyi, nji iya ta nọhedu nweru nwa; ọdudu buru nwa-nwa; tẹ ẹgirima ono mụta l'ọo ẹphebedua e-vukpooduaru ụzo leta ndu ufu ẹphe ẹnya. L'ọ kwa iphe gbaru ndu kẹ Nchileke ndono. Ọo ya bụ; ẹphe eshi ẹge ono melataru ndu mụru ẹphe ọhuma, ndu ono, mụru ẹphe ono meru ẹphe. Ọ bụ ono bụ iphe dụ mma l'ifu Nchileke. ⁵ Ọlobu tẹ nwanyi, nji iya ta nọhedu, ẹ-te nwehedu ẹge ọ maru iya onwiya lẹ phuu; to nwe onye eleta iya ẹnya; bụkwaru Nchileke b'ọo-nọduje ele ẹnya l'ẹka. Tẹ nwanyi ono ba atugbejekwa ẹka l'okfu anụ Nchileke: eswe l'enyashi. Iphe ọo-nọduje ekfuru Nchileke bụ t'ọ kwọo ya lẹ mkpa. ⁶ Obenu lẹ nwanyi, nji iya ta nọhedu ọphu anọdujelephu emelephu iphe bataru iya l'obu bẹ nwuhwakwaru anwuhu l'ẹke ọ nọ ndzụ. ⁷ Ọ bụ iphe ii-kfuru ẹphe ndono; mbụ kfua ya kwata kfushiaru iya ẹphe ike; k'ọphu ẹphe a-nọdu eme umere, gbaru ẹphe. Ọo ya bụ t'ẹ b'o nwe ẹke aa-phuta ẹphe ọru. ⁸ Teke bụ l'ọ nweru onye haru ndu ẹphe l'iya bụ; too leta ẹphe ẹnya; ketekete ndu ọphu bụ ndu ụlo iya gẹdegede bẹ onye ono ekoshikwa lẹ ya te kwedu kẹ Kuráyisutu; mbụ; onye ẹ-te kwedu kẹ Kuráyisutu bẹ gbe kakwa iya nụ mma.

⁹ Teke ii-nọdu edeshi ẹpha ụnwanyi, maa turu; be edebukwaa ẹpha ndu ọphu ẹ-ta anọrudua ụkporo afa ugbo ẹto; k'ọphu a mụru ẹphe. Onye ii-deje ẹpha iya bụkwa onye bụ

nwoke lanu nwenkinyi b'ọ lujeru. ¹⁰ Tẹ nwanyi, ii-de epha iya l'ekwo bukwaru nwanyi, onu wukoru l'ome ohuma nk'iya. T'ọ bukwaru nwanyi, zufutawaru unwu iya ohuma; buru nwanyi, bu o-kwa-eyee; bukwaruphu nwanyi, gudewa mini kwochawa ndu ke Nchileke okpa; buru nwanyi, yewaru ndu eje iphe-ehuka eka; bukwaruphu onye wowaru onwiya yekota l'ome iphe bu iphe-oma mgburumburu.

¹¹ Be edebukwaa epha unwanyi, maa tufuru; mbu ndu ophu bukwađu unwanyi ogbanga. Ishi iya aburu l'obuje teke egu iphe aguje epe gutaleruphu epe; epe agberu Kuráyisutu azu; chode ege epe e-me je aluru nji odo.

¹² Epe -mee ya ege ono; kwa iya bu le Nchileke a-nma epe ikpe; okfu l'ephe te mehedu iphe ono, epe kweru Kuráyisutu ukwa iya l'odungu ono. ¹³ Iphe odo aburu l'unwanyi, nji epe ta nohedu; mbu ndu ophu bukwađu unwanyi ogbanga anonyajee; enyiru atua epe ekwa l'ishi; epe etsoru kpuphelahaa l'ulo l'ulo. Ophu ka eji aburu l'ephe etsojeru edophe kwekweekwee; buru o-jeru-okfu-e-te-kudu-ephe. Ege ono be epe anoduje ekfukwapu iphe e-ta gbadu epe l'ekfukfu. ¹⁴ O kwa iya meru iphe mu suru te unwanyi, maa tufuru; mbu ndu ophu bukwađu unwanyi ogbanga je alutsuaru nji odo; mushia unwu; leta ulo epe enya. Oo ya bu k'ophu onye ugu ayi ono te enwedu iphe oo-phu ayi l'ehu; gude ekfubyishi ayi. ¹⁵ O nwekwaru-a unwanyi ono, nji epe ta nohedu ono ndu ophu gbe hawanu otso Kuráyisutu; ghakobe tsolahaa Setanu. ¹⁶ Oo

ya bụ; ọ -bụru l'ọ nweru nwanyi, kweru ke Kuráýisutu, nweru abubu iya onye ọphu maa tufuru; te nwanyi obu letakwa nwanyi ono ọnya. Te nwanyi obu ba apatakwa mkpa ọhu nwanyi onanu, maa tufuru ono bya ebo chochi. T'ọ bụlekwaruphu unwanyi, nji ọphe ta nọhedu, bụ ndu ọphu ẹ-te nwehedu ẹge ọphe maru iya onwephe le phuu; be chochi a-nọduje eleta ọnya.

Ndu e meru ọgurenya Chochi

¹⁷ Iphe gbaru l'ememe bụ t'a kwabeje ndu e meru ọgurenya chochi ugwu ọkpobe akwabe; mbukwa ndu ọphu ejeru chochi ozi ọhuma; ketekete ke ndu ono, keberu ọhu l'ara okfu Nchileke arara; ezikwa iya phụ ezizi ono. ¹⁸ L'e dekwaru iya l'ekwo okfu Nchileke; sụ: “Unu be ekechijekwa eswi ọnu teke ọodzoshiru unu witu unu.” Bya asukwaphu: “Onye eje ozi be gbakwaru ke ọnataje ugwo ozi, ooje.” ¹⁹ Ọ -bụru l'ọ nweru onye sụru l'onye e meru ọgurenya chochi be meru eji; be eyekwaru onye obu ọnu; gbahakwaa l'a -dụ ẹbo; m'ọ bụ ẹto agba iya ekebe l'ọ meru-a iphe obu l'oswiya. ²⁰ Ndu ọphu, bụ ndu eme iphe dụ eji; be ị-bajeru mbà l'edzudzu ọha. Ọo ya bụ k'ọphu ndu ọphunanu a-tshukwanu egwu ome iphe dụ eji.

²¹ Mu ekfuru ngu iya ekfushiru ngu iya ike; mbụ; Nchileke me Kuráýisutu; me unwu ojozi-imigwe ono, ọ fotaruru ono anukwa iya-a; sụ t'i tukokwa iphe bụ iphe-a, mu sụru ngu t'i meje-wa l'ọ ha mekotaje. Ba anmajekwa madzụ ikpe teke nggubedua ta maghedua iphe onye obu meru;

ọphu to nwekwa iphe ii-leje madzụ ęnya l'ifu eme. ²² Riodujekwa iya ariri ęmanu nggu ebyibe madzụ ęka l'ishi; be emejekwa iya gburugburu. T'ęka ngu ba adukwa l'iphe dụ ęji, ndu ọdo eme. Dobelekwapu onwongu ọgà.

²³ T'ę b'ọ bụlekwaphu mini nkinyi iya; bę ii-nguje. Ngutajekwa męe nwanshi; l'ògvù ępho ngu ono; mę l'ęhu-ba-dụ-mma ono, anọduje eme ngu tekenteke ono.

²⁴ O nweru ndu iphe dụ ęji, ęphe eme bụ iphe dụ ęji ọphu a tuko elewa-a l'ęnya; mbụ; o gbekwa dụwanu l'a -suru l'iphe dụ ęji, ęphe eme ọbu gbe vuwaru ęphe ọzo eje tę Nchileke nmaa ęphe ikpe. Yo nwekwaruphu ndu ọphu abuje: a -nony-a-odu; ęmanu iphe dụ ęji, ęphe eme avo-lishihu. ²⁵ O kwaphu ęge ono b'ọ dụ ome ọhuma. O nweru ọhuma, madzụ emeje; yọ bụru ọhuma ọphu a tuko elewa-a l'ęnya. Teke bụ l'o nwekwanuru ọhuma, e meru, ę ta phudu l'odungu; a -nonyakwaaphu; yọ tuko vọ-lishi.

6

Ndu, bụ ohu

¹ T'iphe bụ ndu bụ ohu gubeje nnajiufu, nwe ęphe lę ndu gbaru t'a kwabeje ugvu. Oo ya bụ k'ọphu ę te ewotadu ępha Nchileke; mę iphe ono, ayi ezi ono gwọo lę ntụ. ² T'ohu ndu ọphu nnajiufu ęphe bụ ndu kweru kę Kuráyisutu be engejekwa nnajiufu ęphe ęka l'ishi; l'ęphe tükokwa bụru unwunna lanụ. Iphe ęphe emejechia bụ t'ęphe gbe kakkpọoruru ęphe ojeru ozi ejeshi iya ike; keshinu onye nweru ohu; bya

ekwe kẹ Kuráýisutu maru lẹ Nchileke yeru iya obu; yọo nọduje emeru ohu iya ọhuma; gude ebu iya nggo ozi iya ono, oojeshiru iya ike ono.

Tímoti; ọ bu iphe ono bẹ ii-nọduje ezi ẹphe. Nnggu anmashijeeru ẹphe ọkwa iya ike t'ẹphe meje iya.

Ejo nzizi; mẹ ọkpobe ẹku

³ Teke o nweru onye ọdo, bya ezide iphe ọdo, gbaru iche; onye ọbu te kwe l'okfu kẹ Nnajiufu ayi, bu Jisọsu Kuráýisutu bu okfu, anu ọkpobe ndzu; mbu; onye ọbu -jikafua iphe ono, ayi ziru lẹ kẹ ẹge ee-shi etso Nchileke ono; ⁴ onye ono bẹ ekukwa onwiya ekuku; l'ẹ b'o nwe iphe ọ maru. Iphe yẹ l'onye ono eme bukwa ntutego; mẹ ọbaphe mbà okfu, ẹ-te nwedu ishi; okfu, bulephu iphe ọokpataje bu ẹkwò; madzu yẹ madzu ọdzo ẹnya; okfurushi madzu; ole madzu ẹjo ẹnya; ⁵ mẹ ọnodujeru madzu l'ẹjo oshi. Ndu, du ẹge ono bu ndu egomunggo dahwaru ajilakpa; bukwaruphu ndu ẹ-ta mahedu ọkpobe okfu ono. Ẹphe anọduje ari l'otso Nchileke bu ọzo, ẹphe e-shi rita uru.

⁶ Mbu; yọ bukwaru-a oswi-okfu. Madzu eritajekwa uru, ha nshinu m'oo -tso Nchileke. Obenu l'ọ kwa m'ọ -buru l'iphe onye ọbu nweru: ẹge ọ ha ẹge ọ ha edzujeru iya. ⁷ L'ẹ to nwekwa iphe ayi gude bya mgboko-a; ọ kwaphu ẹge ono b'ẹ to nwedu iphe ayi e-gude shi lẹ mgboko-a ala. ⁸ Ọo ya bu; ayi -nwewaru nri; bya enweru uwe oye l'ẹhu; t'ọ dzujeeru ayi. ⁹ Obenu lẹ ndu anọduje achọ ẹge ee-shi t'ẹphe kpaa ẹku bẹ ẹjo iphe ono, ẹphe anọduje achọ ono enwujeru ye l'ome iphe

dụ ẹji. Yò buru iphe ono abujeru ọnya; hata ẹphe. Igweligwe ẹjo iphe agù ẹphe tükokwa buru iphe mmakanù; buru iya bụ iphe e-butá ẹphe anù hùbe l'ọku; lọta ẹphe lọ-mia l'ẹke ẹphe a-nọdu mebyihu; lakọta l'iyi. ¹⁰ L'ọ kwa oye ẹnya l'okpoga bẹ bụ ẹke iphemiphe ọbule, bụ ẹjo iphe futaru. O nwekwaru ndu bụ okfu l'ẹphe achọ okpoga bẹ ẹphe gudewa iya ru shiswewaru ọzo; haa ekwekwe, ẹphe kweru kẹ Kuráýisutu. Yò bükwaru iya phù meru; ẹphe egbe shi ẹge ono gude ẹka ẹphe kpataru onwẹphe iphe-ẹhuka, ha l'igweligwe.

Iphe Tímoti e-meje

¹¹ Obenu l'agha: nggubedua, bụ onye kẹ Nchileke-wa; zelajekwaaru egbe iphe ono l'ọ ha. Keshia ẹhu seje t'ì buru onye doberu ẹka ndoo; nggu esekwaphu t'ì buru onye akwabeje Nchileke ugvu. Tẹ ẹka shikwaa ngu ike l'ekwekwe ono, i kweru kẹ Kuráýisutu ono; nggu eyeru ndu ọdo obu. Tajekwaru iphe nshi; nggu adukwaphu agu. ¹² Dulekwaphu l'ọ bụ onye maru ọgba ọso; mbụ; keshikpelekwaphu ẹhu gbajẹ ọso-amama ono; bụ iya bụ ọso, gbaru onye kweru kẹ Kuráýisutu. Kebe ẹhu gbajẹ iya; k'ophu ìi-gbaru ẹke a tuburu t'a gbarua; nata obunggo ọso ono, bụ iya bụ ndzụ gbururu jeye. Ọ bụ kẹ ndzụ gbururu jeye ono bẹ Nchileke kuru ngu t'ì bya enweru teke ono, i vudo l'ifu igwe ọha raa ya tororo; l'ì kwetaru ọkpobe okfu kẹ Kuráýisutu ono. ¹³ Ọo l'ifu Nchileke ono, bụ Nchileke ophu anuje iphemiphe ọbule ndzụ; mẹ l'ifu kẹ Kuráýisutu ono, vudo l'ifu Páyileti

gbaaru okpobe okfu ono ekebe ono; ọọ l'ifu ẹphe; bẹ mu nọ l'ekfu iya ekfushiru ngu iya ike sù: ¹⁴ t'ì tũkojelekwaphu iphe mu kfuru ngu l'ọ ha meje. T'ẹ b'ọ dukwa ẹke ii-tsoswe iya m'ọo ẹkalanu; k'ọphu ẹ too nwedu ẹke aata ngu uta jeye teke Nnajiufu ayi, bụ Jisọsu Kuráýisutu a-bya ọdo. ¹⁵ O -rulephu teke gbaru nù bẹ Nchileke e-me t'a phugbaru Kuráýisutu ọbu; mbụ Nchileke ono, dọberu mma; dzukota oke l'ime onwiya; bụru yẹbedua nwẹnkinyi iya bụ Nnajiọha; bụru Eze, kakọta iphe bụ ndu eze; bụru Nnajiufu, kakọta iphe bụ ndu bụ nnajiufu. ¹⁶ Ọo ya nkinyi iya bụ onye ẹ-ta byadu bya anwuhu anwuhu. Ẹke o bu bẹ iphoro, nọ iya nù te ekwejekwa tẹ madzụ jenyabe iya ntse. Ẹ to nwekwa madzụ nwigbaleke-oma, gudejewa ẹnya phụ iya; ọphu to nwekwa onye byaru bya a-phụ iya. T'ọ bụru iya bẹ ndiphe a-kwabeje ugvu; ike ono, bụ 'o-nwe-agvugvu ono aburu nk'iya. Ono kwa ẹge ọ dọ.

¹⁷ A bya lẹ kẹ ndu nweru iphe l'eli mgbokoa: iphe ii-kfuru ẹphe kfushiaru iya ẹphe ike bụ t'ẹphe be egudekwa iya eku onwẹphe ekuku; ọphu ẹphe 'edobejekwa obu l'iphe ono, ẹ-te nwedu ẹge ọo-nọ-bebe ono. T'ẹphe dobechia obu ẹphe lẹ Nchileke ono, bụ o-me-l'uko ono. Nchileke anukotaje ayi iphemiphe ọbule; nù ayi k'etsubo iya; ẹge oo-me t'ẹhu tsomahu ayi. ¹⁸ Tẹ ndu nweru iphe meje iphe dọ mma; mbụ t'ẹphe mejekpoo iphe dọ mma tekenteke; t'ẹphe bụru o-me-l'uko; yoo heje ẹphe uhare t'ẹphe lẹ ndu ọdo gbaru mgba l'iphe ẹphe nweru. ¹⁹ Ọ bụ teke ẹphe eme ẹge ono; bụ iya bụ l'ẹphe e-

nweru ọkpobe iphe. Ishi iya aburu l'ẹphe e-shi ẹge ono kpata ọgbodo iphe kuberu onwẹphe; mbu ọgbodo iphe ọphu a-noduru ẹphe jeyewaru l'uzo ifu. Oo ya bu k'ọphu bu teke o ruleruphu; ẹphe anata ndzu ono, bu ọkpobe ndzu ono.

²⁰ Byiko Tímoti; kwabẹlekwaruphu iphe ono, e yeru ngu l'ẹka ono ẹnya. Nggụ eletaje ẹnya t'ẹ b'i kfuje mkpọkoro okfu, bu iphe eswe; tii tu-pheje mkpọkoro ntutego, bu iphe madzu ahajeru su l'ọ bu mmamiphe; l'ẹ b'ọ bu mmamiphe. ²¹ O nweru ndu anọduje arị l'ẹphe maru mmamiphe; ẹphe egude ẹge ono phua uzo l'ekwekwe ono, ayi kweru ono.

Tẹ Nchileke meeru unu eze-iphe-oma.

Bayiburu Ikwo
Ikwo: Bayiburu Ikwo Bible

copyright © 2014 Wycliffe Bible Translators, Inc.

Language: (Ikwo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

3867ef4e-3384-5ab4-a937-63476bb8a7bb